

श्री लुंमधि (अजिमा) भद्रकालीयागु
संक्षिप्त परिचय



२९४.३४३५
३१६८श्री

जुद्धरत्न वज्राचार्य
राजकीर्ति महाविहार
(टेबहा, यँ)

श्री लुँमधि (अजिमा) भद्रकालीयागु
संक्षिप्त परिचय



जुद्धरत्न वज्राचार्य
राजकीर्ति महाविहार
(टेबहा, यँ)

पिकाकः

सुनकेशरी वज्जाल्चार्य

का.म.न.पा. २२ वडा

ख १/१९२ टेबहा

कान्तिपुर

फोनः २४४१८८

प्रथम संस्करण ५००

प्रकाशनः बुद्ध सं. : २५४१

ने.सं. : १११८

वि.सं. : २०५४

ई.सं. : १९९७

मू-तका १५/-

लुंमधि अजिमाया स्तुति

पात्रं यस्याः कुंकुमांगी कमल कलिलया जापमाला जपन्ती
मध्यान्हे क्रोध रूपा विकसित वदना चारु नेत्रा विशाला
सन्ध्यायां बृद्धरूपा ज्वलित कुचयुगा मुण्डमाला जपन्ती
सा देवी देवदेवी त्रिभुवन जननी चण्डिके पातु अस्मान् ॥
अष्ट क्षेत्र स्थिता देवी अष्ट वृक्ष निवासिनीम् ।
अष्ट भैरव संयुक्तां अष्टमातृकां नमाम्यहम् ॥

समर्पण

जितः पूजाविधि गुरुमण्डलनिसें स्यना विज्याम्ह ब्रह्मचक्र महाविहार
ओमवाहाया स्व. गुरु पाजाबाज्या आदरणीय श्री हर्षवीरसिं (कान्छा गुरुजु)
वज्राचार्य, जितः अंग्रेजी ब्वनेत मागु ग्वाहालि याना ब्वंका विज्याम्ह श्रद्धेय
पाजु श्री जोगरत्न वज्राचार्य,

जितः २०१२ सालस दीक्षाया थकालि याना दीक्षा विया विज्याम्ह
तया चर्या गीत (चचा) व श्री पद्मान्तक आजुया थास दँयदसं महावलि
पूजायात माको नृत्य स्यना विज्याम्ह सुरतश्री महाविहार (तक्षवाहा)या
आदरणीय स्व. पाजु डेमचूडामणि वज्राचार्य (नाति गुरुजु)या सेवास थ्व
“श्री लुमधि (अजिमा) भद्रकालीयागु संक्षिप्त परिचय” श्रद्धां द्वहलपागु जुल ।

वसपोलं २००३ सालस न्हूवाहाले व २०१२ सालस थःगुहे विहारं
दीक्षा विया विज्यात । २०१२ साले वसपोलं मूवाहा, मूलश्री महाविहार
तःमातयाम्ह कुमारी विज्याकाः ताहासिन्हःपूजा नं याना विज्यागु जुल ।

जुद्धरत्न वज्राचार्य

जिगु खँ

स्वनिगल्य् च्वंगु धार्मिक व सांस्कृतिक विषयवस्तुया महत्वपूर्णगु तथ्यत सीकेत खीकेत पं. श्री बद्रीरत्न वज्राचार्यजुं च्वया विज्यागु आपालं ग्रन्थत मध्ये लुंमधि अजिमायागु नं छगू खः । वसपोलं च्वया विज्यागु सफूया लिधंसा कयाः जिं थ्व सफू च्वयागु खः ।

टेबहाया लुंमधि अजिमाया द्योगू खलःया थकालि श्री माहिला दाइयागु सहयोग व द्योगू खलःतय् नापच्वना सल्लाह साहुति याना वयकःपिनिगु प्रेरणां व अनं प्राप्त जूगु लेख शिलापत्रयागु फोटोकपीया लिधंसाय् थ्व सफू च्वयागु खः । वयकःपिसं यानाबिया दिइगु ग्वाहालिया लागिं धन्यवाद बियागु जुल ।

थुगु सफूया पाण्डुलिपि स्वया विज्याना शुद्धाशुद्धि व माःगु सशोधन यायगु व प्रूफ स्वया विज्यायगुलिइ नं अमूल्य ई बिया विज्याना जितः सफू च्वयत देवमाला (भाषा) वंशावलि समेत बिया विज्याना ग्वाहालि याना विज्याम्ह रत्नकेतु महाविहार (भवावहा) या वज्राचार्य आदरणीय श्री फणीन्द्ररत्नजुयात जिं छुं दोहलपे मफुसां जिगु दुनुगःया स्वां छफो व यथा श्रद्धां धन्यवाद देछाना च्वना ।

थुगु सफू प्रकाशनय् हयत प्रेसय (थाकुथिइ) विज्याना थःगु अमूल्य ई बिया विज्याना ग्वाहाली याना विज्याम्ह कृति पुण्य वज्र धातु चैत्य महाविहारया वज्राचार्य भाजु श्री चक्रमुनियात नं दुनुगलं निसें धन्यवाद देछाना च्वना ।

अन्त्यस, थ्व चिकिचा धंगु सफुतिइ गाः मगाः व स्यंगु दंगु दःसा क्षमा फ्वनागु जुल । नापं मगाः मचाःगु दंगु स्यंगु भिंकेत सल्ला बिया विज्याइ धयागु नं आशा दु ।

ने.सं. १९९८ शुक्ल

तछलाथ्वः तृतीया, आइतवाः

जुद्धरत्न वज्राचार्य

राजकीर्ति महाविहार

(टेबहा) यें ।

छत्वा खँ

न्हापायापिं मनूत प्रकृतिया प्रकोप खना ग्या । देवदेवी प्रति श्रद्धा भक्ति अप्पो दु । ध्व विश्व नैंकभनं वःगु परिवर्तनं याना थौं मनुखं प्रकृतिया प्रकोप छांय जुइगु, गय जुइगु धका सिल । थौकन्हें मचांनिसैं छांय छु गथे धका नेने सल । अन्धभक्तिइ विश्वास मदया वन । उकिं जिज्ञासु जुया न्ह्यागुं खँ छांय खः, गथे खः धका सिइकेगु थुइकेगुलिइ मनूतय ध्यान वन ।

२००७ सालया प्रजातन्त्रन्हयो तक नं बन नेपाले सफू च्वयगु, प्रकाशित यायगु स्वतन्त्रता मदु । उवलेया राणा सरकार जःभोछिसिया सरकार जुयाः जनता शिक्षा कया सःसिउपिं जुल कि विश्वया गतिविधि सिइ, युइ । थथे सिल कि, थुल कि थःपिसं जनताया उपरे यानानयागु शोषण व दमनया विरुद्धे विद्रोह याइ धका ग्या । उकिं थन जनतायात सफू पत्र-पत्रिका च्वयगु च्वनेगुपाखें दुरुत्साहित याना तःगु खः । पण्डित निष्ठानन्द वज्राचार्य ललितविस्तर ग्रन्थ थःम्हस्यां तुं घ्वाना पिकाल धका व पण्डित सिद्धिहर्ष वज्राचार्ययात लैनचौर जेउगु उद्योग प्रदर्शनिइ थःम्हस्यां तुं च्वया रञ्जना व नेपालाक्षरया वर्णमालाया भोपौभा बोल धका उवलेया सरकारं किम सिक्क ख्याना हल धयागु खँ नेना तःगु हे खः । उकिं उवले सफू च्वयगु साहस यापिं वज्राचार्यपिं उस्त खनेमदु । उवलेयापिं मनूतयके ज्ञान विनाया श्रद्धा व भक्ति जक दु । थुकिं हे उपिं लुदं व मुग्ध जुया च्वन ।

प्रजातन्त्रं लिपा नेपाली जनता च्वयत-वोनेत, सिइकेत-सयकेत स्वतन्त्र जुल । थमं मसिउगु खँ नेने जिल, सिउगु खँ मग्यासे कने जिल । नेना-निना, माला-मिला सोया थःगु सन्देह-शंका निवारण यायगु अवसर दत । थःथःगु भासं सफू च्वया पिकाय जिल । न्हापा अनुवादे जक लिकुंका च्वपिं वज्राचार्यपिं अध्ययन अनुसन्धानया वःकया मौलिक ग्रन्थ च्वयपाखें न्हेज्यां वल ।

जुद्धरत्न वज्राचार्य तेवाहाया पाल्हाद्योया घोपा चौँचों पाल्हाद्योया विषये थमं सिउगु थुउगु खँ तया सफू च्वयगु विचार याना विज्यात व सफू च्वया प्रकाशित नं याना विज्यात । वसपोलं च्वया विज्यागु “श्री संकटा राजकीर्ति महाविहार (टेबहाल) को संक्षिप्त परिचय” (२०५३) सफू पाठकतसैं च्वने ययकल । थुकिया प्रचार जुल ।

तेवाहाले लुंमधिद्योया द्योछें दु । तुनिख्योया पूर्वदक्षिण अग्नेय दिशाय लुंमधिद्यो धालसां भद्रकालीया मन्दिर दु । ध्व हे मन्दिरया लागाय जुद्धरत्न

वज्राचार्यया कुलदेवता दु । थ्व लुंमधिचोया जात्रा मचानिसें सोया वया च्वंगु व लुंमधिया वारे थमं सोया खना व नेना च्वना नं तःगु दुगुलिं वसपोलयात लुंमधि अजिमाया वारे नं छुं च्वयगु मनोकामना जुया वल । थुकिया हे मूर्तरूप थ्व “लुंमधि अजिमा (भद्रकाली) या संक्षिप्त परिचय” खः ।

सफू च्वयगु खँ ल्हायगु थें मखु । ल्हानागु खँ न्ह्योनेचोपिसं ताइ, मेपिसं ताइमखु । सकसिनं तायके थें याना खँ ल्हा जुइ नं फइमखु तर च्वयागु सफू थासं थासे थेना च्वनि, जुगं जुगं तक लेना च्वनि । उकिं सफुलिइ सत्यासत्य विवेचना मयासे छुं खँ नं च्वय मजिउ । अध्ययन अनुसन्धान याना सत्यया वः कया विवेकपूर्ण जुइक च्वयगु यायमा । च्वयागु दोन कि ल्हा त्वाल्हाना थें जुइ । दोंगुयात भिंकां भिंके थाक् । उकिं न्हापा हे गनं मदोनेमा धका सतर्क जुइमा । किन्तु दों हे मदोनि धाय मफु । न्यासि वंम्ह मनू दइगु, सल गःम्ह कुतुं वइगु स्वाभाविक खः । दइ धका ग्याना न्ह्या मवनेगु, कुतुं वइ धका भय कया सल मगयगु सोया दःसा थ द धका दयक दयक नं न्ह्या वनेगु, सलम्हं कुतुं वःसा हानं हानं सल गयगु, सलयात कावुइ कया न्ह्या वनेगु प्रयासया दसु व प्रगतिया चिं खः । साहस याना न्ह्या वंम्ह मनू लक्ष्ये थेनि । ग्याफर जुया वत्तुक फेतुना च्वंम्ह मनू व करपिसं यागु ज्याय कुंखिना नागःतुगः जक याना च्वनिम्ह मनू लोहं थें सदा वहे छथाय तुं लाना चोनि । मनूया जीवन लोहं जुइत मखु । मनूया जीवन वरदान विइफुम्ह चो जुइ मफुसां फुफुकथं समाजया सेवा याना थुकिया छुं चिं थन तोता थकेत खः । वःम्ह वन धायका शून्ये विलीन जुया वनेत मनुष्यया जन्म जुउगु मखु ।

पासा जुद्धरत्न वज्राचार्य हानं हानं थथे हे च्वया वने फयमा थ्व हे जिगु भित्तुना दु ।

भ्रवावाहा, थंहिति, थें
ने.सं. १९९८ थिलाथो ११

फणीन्द्ररत्न वज्राचार्य

लुँमधि अजिमा, भद्रकालीयागु

संक्षिप्त परिचय

थ्व पुण्यभूमि नेपा दे प्राचीन कालनिसें छगू सुन्दर नगरया रूपय् प्रख्यात जुयावया च्वगु वाय खः । थन श्रीकरुणामय अमोघपाश लोकेश्वर, जनवहाद्यो जम देशं हयाः कनकचैत्यया न्हेवने पूर्वाभिमुख यानाः स्थापना याना तःगु जुल । थनयापि जनतात न्हिन्हि आयागु ओघ (इन्द्रचोक) धाइगु थाय न्हापा थन निगू खुसि संगम जुया च्वंगु तीर्थस स्नान यानाः स्वयम्भू भगवानया दर्शन याना वय धुंका श्रीअमोघपाश लोकेश्वर (जनवाहाद्यो)या दर्शन गइगु चलन जुयाच्वन ।

वसपोलपिनिगु नित्य सेवा दर्शनया प्रभावं यानाः थन कान्तिपुरय् च्वपि जनतात सुन्दर शरीर जुया हृष्ट पुष्ट जुयाः च्वंगु जुल ।

स्वर्गया देवराज इन्द्रतकं थन मर्त्यमण्डलय् बिज्याना श्री अमोघपाश लोकेश्वर व स्वयम्भू धर्मधातुया दर्शन यायत वंघः गुकियात थौ कन्हय इन्द्रचोक धै वै च्वंगु थासय होंगलस स्नान याना बिज्यागुलि थुगु थाय इन्द्रचोक धका प्रख्यात जुल । थुगु थाययात नेवाःतसें ओघः व मेपिसं इन्द्रचोक धायगु यानाच्वन ।

उगुहे इलय यलयाम्ह जुजुं थ्व कान्तिपुरस हमला यावल । थ्व हमलाय यक्को धनजन नाश जुल । मनूत यक्को हे सित । यलयतयसं नर सिंह ब्वना हयाः थन च्वपि ल्यासे ल्यासेपिं मिसातयत यल देशय यंकल । थयोगु अवस्थाय थन कान्तिपुरयाम्ह जुजुं व प्रजागणपिसं छुं याय मफया मूकदर्शक जुया मनय चिन्ता जुइका च्वनाच्वन । ओहो उलिमछिं धन सम्पत्तिया नोक्सान जुल । आः छु यायेगु जुई थुगु युद्धय् सीपिं मनूत मसानय यंका उइ मफया फुक छदौं चिन ।

छन्हु यें देशयाम्ह जुजुं नेपाया नांजाम्ह तान्त्रिक मन्त्रसिद्धि महाविहारे च्वम्ह शाश्वतवज्र वज्राचार्य, थौकन्हय वटु सबल बाहायाम्हयात दरवारय ब्वना हयादिसं धका जुजुं आदेश बिया बिज्यात । जुजुयागु आदेश मुताविक जो आज्ञा महाराज धका धया मन्त्री उघिमय तान्त्रिकया छेंय थ्यंक वन । मन्त्री तान्त्रिकया छेंय वःगु खनां ओहो मन्त्रीजु छि थौ आपुलखं जि थाय भ्हायादिल धका शाश्वतवज्र वज्राचार्य नेना बिज्यात । मन्त्र महाराजं छलपोलयात आः थयें सःता बिज्यागु दु उकें वयागु धाल ।

मन्त्रीया नापनापं शाश्वतवज्र वज्राचार्य दरवारय थ्येक विज्यात । महाराजया जय जुइमा आज्ञा विया विज्याहुं महाराज, जिं छु सेवा यायमाल धका शाश्वतवज्रजुं विन्ती याना विज्यात । जुजुं आज्ञा दयका विज्यात भीयाय यें देशय शत्रु देशया सेनातयसं अचानक आक्रमण यावल, उकिं भीगु देशय यक्को नोक्सान जुल । छु याःसा शत्रुया सेनात भी यासं लिहां वनी ? भीथाय गथे यासा शान्ति जुई धका शाश्वतवज्रयाके नेना विज्यात ।

शाश्वतवज्र वज्राचार्य धया विज्यात, “महाराज, शत्रु सेनाया शक्तिहीन यायत ला कामरु कामाक्ष (थौकन्हययागु आसाम भारत) स च्वम्ह श्री भद्रकाली परमेश्वरीयात साधना याना भीथाय नेपालय व्वना हःसा जक शत्रु नाश जुइगु संभव दु । जुजुं आज्ञा जुयाविज्यात अथे जूसा छलपोल थौ हे कामरु कामाक्षय विज्यायगु तयारी याना विज्याहुं । माःगु सर सामान मन्त्रि तयार याना वी ।” “जो आज्ञा महाराज, जि थौहे वनेगु तयार याये” परमेश्वरं छलपोलयात सहयोग यायमा धका जुजुं सुभाय देख्छना विज्यात ।

तान्त्रिक शाश्वतवज्र वज्राचार्य श्री भद्रकाली नेपालय हयेगु निम्तिं माःमाःगु हलंज्वलं ज्वना नेपा देशं भारतया कामरु कामाक्ष पाखे विज्यात । लँय आपालं दुःख कष्ट सिया यात्रा यायां वसपोल आसामया कामरु कामाक्ष धयागु पीठय थ्येक बिज्यात । अन थ्यने धुंका वसपोल दकले न्हापां परमेश्वरीयात सादर प्रमाण याना बिज्यात । तान्त्रिक विधिपूर्वक पूजापाठया लिसें कठिन साधनाय तल्लीन जुया विज्यात । कामरु कामाक्ष पीठय च्वना शाश्वतवज्र वज्राचार्य पूर्व सेवा याना श्री भद्रकाली परमेश्वरीयात कताथ्वं दुगु पात्रय साधना याना उगु पात्र कलखय तयाः नेपा देशय हया विज्यात । कलिगत संबत् ३८२५ वि.सं. ७८१ व ई.सं. ७२४ स श्री भद्रकाली नेपा देशय बिज्यागु जुल । वसपोलं थन विज्यागु थौकन्हय १२७३ दँ दय धुंकल ।

भद्रकाली साधना याना हयातःगु कलः दुनिछ्योया छथाय कुंचाय चोंगु सिमाय खानाः महाराजया थाय खबर तिं थ्येके माली धका मती तया शाश्वतवज्र वज्राचार्य व कलः न्हापां छमा सिमाय खाना महाराजयात खबर यायत विज्यात । देशया पिने थौकन्हय राष्ट्रिय नाचघरया लिकं च्वंगु थासय श्री भद्रकालीका साधन याना हःगु पात्र दुगु कलः सिमाय खानाः शाश्वतवज्र वज्राचार्य थम्हं साधना याना हयाम्ह श्री भद्रकालिका परमेश्वरीयात लँस्वयाः लसकुस याना दुकायेत नगरय दुने च्वपिं लोकजनपिन्त कनेत विज्यात ।

भचा जायवं थुखे श्री कालिका दुगु सिमाय खायातःगु कलः अक्ममात् कुतुं वल । उगुहे इलय थःगु वुई वने त्यम्ह छम्ह किसान (ज्यापु) वहे लपुं जुयाः वया च्वन । अन थाय् थ्यंका सिमा कोय कलः कुतुंवया पाःताःखोला व मिसामचा छम्ह दना च्वंगु खना व ज्यापु अजू चाल ।

थुखे श्रीकालिका कलखं पिहा वयाः मिसामचाया रूप कया ख्वख्वं लंय उखे थुखे जुया च्वन । तुप्या नवलिंगपाखे वनेत साःकु क्वविया वःम्ह किसान (ज्यापु) छम्हस्यां थ्व मचा ख्वख्वं जुया च्वंगु खन । उम्ह किसान थ्व मचायाके छं मां सु वौ सु, छैं गन धकां न्यन । व मचां छुं नं मधाः । वं छ जिलिसे वये न्ह्या ला धका न्यन । व मचां न्ह्या धका छयौं क्वान । व किसानं थम्हं क्वबुया हयागु साः अनहे वयं प्वंकल । खःमुलिई छखे मचा व मेखे वजि व थ्वँघः तयाः थःगु वुंपाखे वन ।

वुई थ्यंकाः स्वःवलय व मचा न्हेलं व्वाना च्वन । व किसानं मचायात थःगु वलचाय म्ह बच्छि किचः लाका थ्यनाः थः वुई ज्या याः वन । वजि नयेगु ई जुलकि किसान वजि नयेत वलचाय वल । वलचा थ्यंकाः स्वःवलय थःगु वलचाय थ्यना थकाम्ह मचा नं मदु नयेत हःगु वजि ज्वलं नं मदु । थ्व खनाः किसान आश्चर्य चाल । अले व मचायात उखे थुखे माः जुल । माः जुजुं किसानं मचायात खंकल । मचा किसानया न्ह्योवने थ्यंक वल । किसानं मचायात धाल । व मिसामचां थःगु मचा रूप तोता श्री भद्रकालीया थःगु स्वरूप किसानयात दर्शन विया बिज्यातः । वसपोलं आज्ञा जुया विज्यात “छ खना जि अति प्रसन्न जुल । छु वरदान प्वने प्वं ।” किसानं ल्हा जोजलपा विन्तियात “प्रभु जितः छु हे म्वाः । छपिं थन नेपाले हे च्वना विज्याहुं । थःगु धासय् लिहां बिज्याय मते । थन नेपाल देशय् च्वपिं प्राणी मात्रया रक्षा याना विज्याहुं ।”

उबलय मचाया शरीरं छगू जाज्वल्यमान तेज (रश्मि) पिहां वल । अले थथे धया विज्यात, जि मचा मखु कामरू कामाक्षयाम्ह कालिका खः । शाश्वत वज्र धयाम्ह छम्ह तान्त्रिकं जितः थन साधना याना हःगु खः । तर जितः तथेगु थायया छुं व्यवस्था मयासे जितः छमा सिमाय् खाया न्हापां खबर विउ वना च्वन । छुं धाथे असत्यया नाश व सत्यया विजय याना च्वनेगु जुल धका आज्ञा जुया विज्यात । सुयातं आपत विपत जुल धासा नं रक्षा यायगु जुल धका आज्ञा जुया भद्रकाली अनतुं अन्तरध्यान जुया विज्यात । धन्य प्रभु धका किसानं परमेश्वरीयाके वरप्रसाद कयाः उखुन्हु हाकनं वुई ज्या याः मवसें थःगु छेपाखे स्वया लिहां वल ।

शाश्वतवज्र वज्राचार्य नगर्यापिं मनूत व्वनाः श्री कालिकायात
लसकुस यानाः नगरय दुने यंके धकाः वल । थम्हं सिमाय कलः खाया
थकागु थासय् थ्यवलय थम्हं गगधना यानाः हयागु पात्र दुगु कलः
छ्यालव्याल जुइक सिमां कुतु ५ या च्वंगु खन । थ्व खनाः शाश्वतवज्र
वज्राचार्य थ्व गथे जुल धका आश्चर्य चाल । वसपोलं प्यखेरं मिखा व्वयाः
स्वत नं कालिकायात गनं नं खंक । विज्याय् मफुत । थुवलय हे मचारूप
कालिकायात खःमुलिइ तया यंकु ह किसान अन थ्वंकः वल । मनूत हूल
हूल मुना च्वंगु खनाः थन छु जूगु धकाः न्यन । मनूतसें शाश्वतवज्र
गुरुजुं साधना यानाहःम्ह कालिका मदुगु खं कन । थ्व खं न्यनाः व
किसानं थन मचा छम्ह ख्वया च्वंगु व व मचायाके छें गन धकाः न्यनां
छुं मधागु व जिलिसें वने न्ह्याःला धयावले न्ह्या धागुलिं थम्हं खःमुलिइ
तयाः वुँइ यंकागु, वलचाय थ्यना थकाम्ह मचा मदयाः माः जुयागु
थुवलय हे व मचां थःत कालिकाया रूप क्यनाः दर्शन व्यूगु फुक खं
कन । किसानं व मचायात मरि छपा वियागु नं लुं जुया च्वन धका कन ।
व ला मचा मखु साक्षात कालिका परमेश्वरी जुया च्वन धका अन जूगु
फुक खं व किसानं सकसिया न्ह्योने कन ।

अयसा जिमित नं अन थासय् छको क्यना बिया दिसं सा धका व
किसानयात आग्रह यात । थ्व खं न्यनाः शाश्वतवज्र वज्राचार्य व वसपोललिसें
लं स्वयेत वःपिं फुक मनूत कालिकाया दर्शन यायेत तुप्या पाखे स्वया
वन । तुप्या थ्यंकाः माः जूवलय कालिकायात मचाया रूपय खन । थ्व मचा
रूप कालिकायात दे स्वकाः लित व्वना हयेत स्वःवलय वयेत माने हे जूगु
मखु । हेकां हेके मफुसेलि शाश्वतवज्र वज्राचार्य थ्व मचारूप कालिकायात
“लुंमधि वी देशय् मदुगु जात्रा क्यने विज्याहुं नु” धकाः हेयका चां चां हे
देश दुने हया विज्यात ।

टुनिख्योया पूर्व कुनय् थम्हं सिमाय कलः खाया थकागु थासय
थ्यनेवं लुंमधि धकाः चताःमधिइ म्हासुक हलुखं पानाः बिया विज्यात ।
देशय् मदुगु जात्रा क्यने धागु सलव्वाका क्यनेगु घोडा जात्रा क्यना विज्यात ।
यौया अद्यापिं चिल्लागा चैत्र कृष्ण औंसी कुन्हु श्री ५ या सरकारं राष्ट्रिय
पर्वया रूपय सरकारी बिदा बिया थो घोडाजात्रा क्यनेगु चलन याना वया
च्वंगु दहे दनि ।

श्री भद्रकालीयात लुंमधि विइ धका हेका हःगु थाय् अद्यापि नवलिंग
कालिका (नःलिङ्गो) पीठया नामं प्रसिद्ध जुया च्वन ।

ध्व नर्वालिग भद्रकालीयागु पीठस २०४०.९.२७ स ध्व सफूया च्वमि सुधान्तं ४६ पीखुम्ह वज्राचार्य व शाक्यपिं पूर्व सेवाया पूजा यायत वना स्व. दे थायपा दं ९४ महास्थविर, श्री आनन्दमुनि वज्राचार्य थकालि जुया विज्याना पं. श्रीवद्रीरत्न वज्राचार्यजुं मांसाहूति होमादि कर्म याना पीठ पूजा याना विज्यागु जुल । अनलिपा ४६ म्हसितं श्रीवद्रीरत्न गुरुजुं उगु पीठयागु ध्यान व मन्त्र विद्या विज्यात । आतक नं पीठ सेवा (पूर्वसेवा) वनिपिसं नःलिनय् वना च्वंगु दनि । वज्राचार्याभिपेक काय धुंका सुनं वज्राचार्यपिसं पूर्व सेवा वना सिद्धि प्राप्त यायमागु विद्वानवर्गपिनिगु धापु दु । पं. श्रीवद्रीरत्न वज्राचार्यजुयागु तत्त्वावधाने यें, यल, ख्वपयापिं वज्राचार्यपिन्त उगु उगुहे क्षेत्रय् पीठ सेवाय यंका विज्याय धुंकुगु दु ।

वागमतीपारी यल देशया पाखें त्वाः वःपिं मनूतयसं कर्णप्रताप (न्हायपं स्याःद्यो) या थाय् थ्यंवल्य यें देशया प्रसिद्ध तान्त्रिकाचार्य शाश्वतवज्र वज्राचार्य कामरू कामाक्ष भद्रकालिका साधना याना हय धुंक्ल धयागु खं सिल । ध्व समाचार न्यनेवं हताः (युद्ध) याये धकाः वःपिं सकसिन भद्रकाली यें देशय् विज्याय धुंका आ भीसं यें देशय आक्रमण यायगु ठीक मजू धका भाःपाः अन्तय शत्रु सेनात उखें तुं विस्पू वन । श्रीकालिकाया प्रभावं यल देश व यें देशया सम्भावी युद्ध शान्त जुल । शत्रुया सेनान लिहां वंगुलीं जनतां शान्तिया मासः ल्हाय खन ।

वसपोल श्री कालिकायात शाश्वतवज्र वज्राचार्य लुंमधि चियाः हेका हःगु जुया नेवाःतयसं “लुंमधि अजिमा” धकाः धायगु यात । तुंख्योलय् व्यंकाः मचा रूपी श्री कालिका अन्तरध्यान जुया बिज्यात । वसपोल थौकन्हय् विशेषतः भद्रकाली नामं प्रसिद्ध जुया बिज्यात । श्रीकालिका अन्तरध्यान जुया विज्यागु थाय ध्व हे भद्रकालिइ खः । थुगु पीठयात वैष्णवी मूल जुयाः वैष्णवी पीठ धका नं धाइ । ध्व पीठया लुखा न्हापा उत्तर दिशा पाखे स्वया च्वंगु खः लिपा जक पश्चिमाभिमुख जूगु खः । ध्व खं कलिगत वर्ष ३८२५ यागु खः ।

वसपोल शाश्वतवज्र वज्राचार्यजुं १७ भीन्हयगू न मयाक ग्रन्थ न्यागुलिं मयाक चचा (चर्या गीत) नं चिना थका बिज्यागु दु । उकिइ मध्ये श्री भद्रकालीयागु चचाया नां पूर्व ब्रह्मायणी खः । चचाया राग भैरवी व ताल भूप खः । मन्त्रसिद्धि महाविहारया वज्राचार्यपिं मध्ये भद्रकालीया खलःतयसं दैय छुंको वज्राचार्यपिनि स्वयम्भूस चिल्लागा ८, अष्टमी दे आचार्य गुठि कुन्हु भुइख्यलय ध्व पूर्वब्रह्मायणी चचा हाला विज्याइगु खः ।

२०३९ ९.९.६ स काठमाडौं महानगर पालिका वटुइ व तुनिख्योतय जिपि ४६ म्ह पूर्व सेवा खलकं श्री भद्रकाली पीठस चोय न्हेथना थे पीठ सेवा पूजा याना वय धुंगु जुल ।

शाश्वतवज्रं कलः खाःगु थाय यौकन्हैया राष्ट्रिय नाचघरया (जमल) लं सिथय च्वंगु पीठया रूपय दनि । किसान (ज्यापु) यात कालिकां दर्शन व्यूगु थाय नवलिंगेश्वरया नामं तुपिया, चपली गां थौ तकं दनि ।

दोला अजिमा (थापाथली) थौकन्हय नेपाल राष्ट्र वैक च्वना वै च्वंगु थाय खः । लंया सिथे थन श्री कालिका हयगु न्हेव हताः (युद्ध) य सीपिनिगु सीम्ह दों चिना तःगु धैगु धापू दु । व थाय थौ तकं दोला अजिमाया नामं प्रसिद्ध जुया च्वंगु दु । थन नं सवल वहाया भद्रकाली खलः वज्राचार्यपिनि पुस्तां थौ तकं नित्यपूजा याना वै च्वंगु दु । ख्व पीठस मोहनी आश्विन शुल्क (कछलाथ्व) या ४ चौथी कुन्हु नवरात्री बनिपिनि कालमोचनय मोल्हुया चैत्यपूजा धुंका ३ दंया भोयव्व थन दोला अजिमाया थाय छायगु चलन थौ तकं दनि । अनं जमलय् वना यमलेश्वर महादेवयात अर्घ याना पूजा यायगु नं प्रचलित हे दनी ।

२०३९/९/२८/४ स जिपिं ४६ म्ह सिनं पूर्व सेवा वना च्वय न्हेथना थे पूजा याना वय धुन । थनया पुजारी श्री पूर्णानन्द वज्राचार्यजुया धापू अनुसार न्हापा पूजा यायत धका ६० पी (रोपनी) जग्गाया आयस्ता वैगु दुगु खः । आ व आयस्ता दुहां मवःगुलिं सकसिनं तोता हल जिं जक पूजा याना वैच्वना तिनिधका २०५४/२/१४/३ स बसपोलयागु छे वना न्यनाबले कना विज्यागु खः ।

श्री कालिका अन्तरध्यान जुया विज्यागु थाय विष्णु पीठया नामं भद्रकाली, लुंमधि अजिमाया देगः तुंख्योल (टुडिखेल) य आतकं दनि । अन पीठय् अष्टमात्रिकाया प्रतीक २ निथी दु धैगु श्री तेजरत्न वज्राचार्ययागु धापू दु ।

काठमाडौं महानगरपालिका २२ वडा टेवहालय (तीर्थविहार) स श्री भद्रकाली लुंमधि अजिमा गवलेनिसें गछि विज्याकल, घोयागु छे गथे जुया स्थापना जुल धैगु विषयय् विद्वानवर्ग व पुरातत्वविद् तया अनुसन्धानकर्तातयसं अनुसन्धान यानाः दिइगु वयकःपिनिगु हे ल्हातिइ दु ।

थन टेवहाया थौकन्हय थकाली जुया च्वना दिइम्ह श्री माहिला दाइपाखें जिं श्री लुंमधि अजिमायागुवारे छगू वहचाधंगु सफू च्वयत छुं दैला धका वयकःयात इनाप यानाबले वयकलं विया दिइगु फोटोकपीस थये न्हेव्वया तःगु दु ।

श्री ३ लुमढी देवी

श्री भद्रकाली

स्वस्ति श्रीकलिगत वर्ष ३८२५ श्री विक्रमाजित सम्वत् ७८१ सालमा
फागुण कृष्ण ९ रोजमा श्रीश्रीश्री लुमढि भद्रकाली देवी कामरूकामाक्षेर्पाठवाट
नेपाल प्रवेश भयाको मिति श्री गुण कामदेव राजाका पर्य्यमा हो यही
राजाको पुत्र लक्ष्मीकाम देव राजावाट जात्रा चलायाको देवी षट् मूलगन्धर्वा
हो शुभम्

श्री

शुभ सम्वत् ९१६ मिति माघमा ११ रोज ७ स श्री ३ लुमढि अजिमा
देवम्हं १३ गछिं श्री ३ रणवहादुरनं दोहलपा जुल तेतवहा षतस जुल शुभं-
गुथि तथा पूजा याना गुथिहार समेतयात भोजन यायगु जग्गा तथा श्री ३
रणवहादुर राजा नं तामापत्र बमोजिं याय माल धका दोहलपा गुथि तथा
तगु दु जुलम् तामापत्र दु जुल ॥

श्री लुमढि अजिमा छम्ह वुरीयागु भेष धारण याना बिज्याना वटु
मिंखादो भुजिंवहालय् चोम्ह छम्ह जोशीयाथास बयों विज्यागु जुया चोन ।
जोशिं वसपोल भेषधारण याना केनेत विज्यागु धैगु सिइका छलपोल सदां
थनतुं स्थिर च्वना विज्यायमाल धका विन्ति यात् धैगु जनश्रुति न्यने दु ।
वसपोल च्वना विज्याथासं दना विज्यावले बै प्यागुलिं काचाकाचां पिने स्वः
वले खने मदयक पिने बिज्याये धुकल वसपोल अनंतुं अन्तरध्यान जुया
विज्यात धैगु नं जनश्रुति दु । जोशीं विन्ति यागु श्रीलुमधि अजिमां न्यना
विज्याना जि शनिश्चरवाःया दिने छुं ई तक च्वना विइ धैबिज्यात धैगु
जनविश्वास दु । उकिं थौया अद्यापिं वटुइ वसपोलयागु द्योछें दनि ।

टेवहायापिसं गुणकामदेव राजाया पुत्र लक्ष्मीकामदेव राजाया पालनिसें
खतय तय गछिद्योपिं जात्रा चलय यायगु धिति अनुसारं थौं तकं खः
क्वविया जात्रा याना बै चोंगु दु ।

न्हापा वटुमितयसं श्रीलुमधि अजिमायागु जात्रा टेवहाखः लिउलिउ
“लियो लियो पायो पायो” धका ढकिइ द्यो तथा जक जात्रा याइगु खः ।
लिपा तिनि स्वः काजी श्री पुष्पराज राजभण्डारीया खलःपिनिपाखें द्योखः
दयकेत मागु ग्वाहाली वःगुलिं द्योखःतय तथा क्वविया जात्रा यायगु जूगु खः
धैगु जनश्रुति दु । थ्व व्यवस्था थौया अद्यापि चलय जुया बैचोंगु दनि ।

श्री ३

आदित्य चन्द्रा वतिलान लोच यो भूमिरायो हृदय यमश्च ॥

अहश्च रात्रिश्चउभेच सध्ये धर्मश्च जानाति भरस्य वृत्तम् ।

स्वस्ति श्रीलुमडीका षट्जात्रामा उटुको षट र टेवहालको पट जोरिइ दुवै पट छुट्टिया पछि टेवहालको टेवहा ल्याउने टेवहालको पट बलसित फर्काई ल्याई वटुका पटका नोल माथि चढाई वटुको खट वसायाको रहेन छन् टेवहालमा धंतसिंको पदसिद्धः -सम्बत् १२६ सालस् टेवहाल ष व वतु ष नाप भक्करा जुया दुन याना त्याकागु टेवहा खत जुल । धंतसिं थाकलिया पर्यास जुल । थ्व दुन याना त्याका जुल फेर हकनं भैभक्करा वटुपति याय मटु यातसा न्हसथु दालसां वटुखःपतिं सहयाय धका कायल जुया न्यालन त्याका जुल ।

थ्वते श्रीलुमधि अजिमाया गुविहार थाकालि धंतसिं, वेष्वासिं ग्याद्यो, गुनसिं, चिकति, जगसिं, स्यावजि, सुषुद्यो, पानसिं, तर्धा, सयजु, धनमन थ्वते १२ म्ह गुथिहारया पालास श्री रणवहादुर महाराजा हिजागुसि वुपिक ६० कमलाति वुपिक २० वषूडो २० पिक षासिंदो वुपिक ३ फूलवारि वु पिक ६ थुति वु दोहलपा तल जुल । थ्वते वु दान व्यूम्ह धनमन दगु जुल । श्री लुमधिदेवीया नित्यपूजायात स्वां पुरे याना चोनम्ह अमितसिं गय, धिनजगथ जुल थ्वते पधति चोत्सं तया जुल शुभम् धका च्वया तःगु जुल ।

टेवहाया खः सापहे भ्यातुसैं च्वंगु जूगुलिं द्योगू खलःतयगु सहलहले थुकिइ छुं परिवर्तन हयमागु विचा थौया इलं क्यना च्वंगु दु । जिं स्पूकथं टेवहाया खःयात वागदरवारस च्वनादिइपिं श्याम राजा शंकर राजापिसं मर्मत याय्त् छुं दयके मासा अनपाखें न्हापा न्हापा ग्वाहालि विया च्वंगु खः ।

श्री भद्रकालीयागु जात्रा प्रत्येक वर्ष चैत्रकृष्ण, चिल्लागाया पाहांचःन्हे, पिशाच चतुर्दशी कुन्हु द्योगागु छें यचुक पिचुक सिले धुंका टेवहालय् खःतय् बिज्याकिइगु जुल । खःतय् बिज्याके धुंका टेवाहाया श्रद्धालु भक्तजनपिस थःगु गच्छे अनुसार खतय पूजा जुई । बहनिमिया ७ द ताः इले दुंख्योलय् गमय् तयत टेवहा चाहिइका गणेद्योगा जब चाहिइका टक्सारं दुने यका खिचापुखू, पाको पुखुद्यां चाहिइका न्हू सकड जुके हई । न्हूसडक तपेंक हया तिनख्यो दथुं यंका द्यो गमय् बिज्याकी ।

वटुमितय नं आ गछिद्यो दय धुंकुगुलिं वटु खः नं अन हे गमय तय यनी । गमय थेंका द्यो बिज्याकेत द्योपाला (द्योला) तयसं द्यो बिज्याकी । च्वय् च्वना टेवाहामि व वटुमितयस द्यो थथे ति अथे ति धका द्योलातयत

निर्देशन विया च्वनी । धन थःथःम्हं धै गये अथे मतल धका द्योलातयत
अशील शब्द ल्हाना वो विइयो । गन सहनशीलता मन्त अन त्वापुया पुसा
पिइथे जुया ल्वापु नं जुइयो । द्यो गमय तयधुंका निखलः नं थः थः छेय
लिहा वनी ।

न्हापा पाहाचहे कुन्हु टेवहाया सिखाकार स्त्र. पूर्णकाजीपिनि व
धनमानपिनि पाखें द्यो गमय् न्हिनय् मांसाहूति यज्ञ यायगु ज्या जि याना वै
च्वनागु खः । आ थौकन्हय् बाली तः मवः धका गुठी मन्याय धुंकल । वहनि
चाकः मत नं च्याकेमाः । द्यो गमय् तःवनीवले गुठीयारतयसं चिलाख
च्याका द्यो लःस्ववंनेगु चलन दु । आ थौकन्हय् थ्व प्रथा खने मन्त ।

आ छुइं न्हापां निसें थपाले तकं टेवहाया जुनुभाइ तुलाघरयागु
ग्वाहालिं द्यो गमय तय यंकिबले पेट्रोम्याक्स ८/९ म्हेसित ज्वंका वहनि
लँस्वःवना च्वंगु दनि ।

फागुनकृष्ण सिल्लागा शिलाचहे कुन्हु न्हापा यचिं कायगु पूजा नं
निखलः सिखाकारपिं दाता जुया जिं पूजा याना वै च्वनागु खः आ थ्व नं
न्हना वने धुंकल ।

द्यो गमय विज्याके धुंका पाहाचहे कुन्हु चान्हय सवलवहाया लुमधि
खः व गुरुजुपिसं पालंपा पा फया मेयागु छ्यो दुयगु यज्ञ थौ तक न्ह्याना हे
च्वंगु दहे दनि । देशय विध्न उपद्रवादि शान्त जुयेमा धका थो होम जुइगु
जुल ।

पाहाचःहे कुन्हु टेवहा नछें गल्ली जुया स्व. सिनारांया खलःपाखें
त्यपद्यो (भैरव) निम्हेस्यां क्वविया गमय् टुनिछ्यो जुया वनी । आ थौकन्हें
सेनातयसं कै तःगु लंगया खालि छकू कोठा मातं तल्लाय लुमधि अजिमाया
सन्मुख लाका पूर्वसोका त्यप द्यो तया पूजा जुई । पूजा सिधयका बलिया
रूपय नेपाफैचा छम्हनं भोग बिइगु चलन दनि । पूजा सिधयका टुनिछ्यो
जुया शाही नेपाल वायु सेवा निगमं बन्द याना तःगु लुखा चायका वयगु
याना वै च्वंगु दनि ।

चैत्रकृष्ण, चिल्लागा औसी कुन्हु सुधय श्रद्धालु भक्तजनपिं टेवाहा व
वटुमित नं गमय देके वनेगु चलन थौ तक दनि । अवलय त्वा त्वापतिं
मलःजा नकेगु ज्या जुई । टेवहालय् च्वपिं सिखाकार व स्थापितपिनि पाखें
पालंपा दैयदसं स्थान गणेद्योया जवपाखे जंको जक याय धुंकुम्ह मचा
थकालि याना मलःजा नकेत मस्तयत पूजा याना पाचालत्ते तया जा तया
बिई । श्रद्धालुपिसं मस्तयत चकलेट बिइगु व दुरु तोंकेगु याना वैच्वंगु दु ।

मलः जा नकेसिमध्यकं त्वायापिनि जा थुया नय मज्यू धैगु जनधारणा दु ।

पाहाचः न्हे कुन्हु छेँखा पतिकं गुम्हेस्यां सुथे गुम्हेस्यां वहनी
लुकुमाद्योयात मायकें जा लाभा घासा समेतं तया छयगु चलन दु ।
सुकुन्दास लुकुमाद्योया थाय अजः फया हया छेँया थकालिं निसें अजः उइगु
चलन दु । थये अजः उल घासा मिखा तेलाई धैगु जन-विश्वास दु । थन
महाद्योनं सुला लाजा नःगु खः । महाद्योयात नं दशा लगेजू थथे सुउवःगुलिं
लुकु महाद्यो घका नां प्रख्यात जूगु खः । थ्व वाखं च्वल धासा थ्व च्वसुं
ताहाकः जुइगु ताया संक्षेपं थुलि जक न्हेथनागु जुल ।

पाहाचः न्हे बले द्योया गमे तुडिख्योया पिच लंया देपापाखे तछ्याना
योसिं थनेगु नं चलन दनी । द्योया जवपाखे पिच पेकू लाक तै तःगु थाय न
व्वमिपिसं खना दिइगु हे दर्ई । अन गुलुमापां इतुंवाहा (केशचन्द्र पारावत
महाविहार) लय् चौम्हेस्यां मचात यको हे “गुलुमापां का बा” धाल धायव
कया नैगु जुया वयात अनं निसें लिना हया थ्व गालय् सूवंगु जुल । लिना
हःपिसं न्यने-कने याना स्वःबले सवलया भद्रकाली खलः वज्राचार्यपिसं अन
गालय् सुउवन धका क्यना व्यूगुलिं इतुंवहालय् जिपिं टेवहायापिं समेतं वना
श्रावण शुल्क यल पञ्चदान गुला थ्व अष्टमीनिसें पुन्ही तक अनया शाक्यपिसं
पाठ याका वै च्वं थाय महाकाल खलः जक व्या लुमधि खलः मथ्या ।

लुंमधि अजिमायात देशय मदुगु जात्रा क्यने धका शाश्वतवज्र
वज्राचार्यजुं हेयका है बिज्या थें थौया अद्यापिं सरकारी स्तरं विदा समेत
बिया घोडाजात्रा क्यनेगु याना वैच्वंगु दनि ।

चिल्लागा औसीया चान्हय लुंमधिया निखः द्योनं गमं थना हया
टुडिख्योलय् दथुई तय दर्ई । चान्हे १.३० ताः इलय् कंग अजिमायागु खः
टुडिखेलय् दर्ई । द्यो ल्वाकेगु धका टेवाहामि व वटुमित खते च्वना तिप्वा
च्याका च्वना च्वनि । कंग अजिमायागु खतं तिप्वा हिला बुला याना
लुमधिया खःयात स्वचा चाहुली कंग अजिमायागु खः लित यंकी । थ्वयात
हे द्यो ल्वाकेगु धै वै च्वंगु खः । अनलिपा निख द्योखः नं थनाहया चिछिं
यतखावहाया पिने तय यनी । सुधसिया प्रहरय् द्योखः अनं थना यना
थःथितिपिं थाय पूजा फ्यकः यंकी ।

चेत्र शुक्ल चउलाख्व प्रतिपदा कुन्हु असनय् वटुखः व टेवाहाखः नापं
निखः नं करिव न्हिने १/२ ताः इलय् कंग अजिमायागु खःयागु प्रतीक्षाय
लैः स्वया च्वना च्वनी । कंग अजिमायागु खः हल धायव चान्हय टुडिख्योलय्
न्हापा तिप्वा हिउम्हेसित लित बिया निखः नाप नं तिप्वा हिले धुन धायव

कग अजिमायागु खः थःगु गन्तव्य स्थान स्वका यनी । थ्व कग अजिमां लुमधि अजिमायात स्वचाः चाहिला वनेगुयात द्यो त्वाकेगु धे वगु खः ।

वटुखः व टेवहाखः न थः थः थाय स्वया असन थना हइ । टेवहाखः असनं महाबू, भोसिंको जुया टेवहाया लं हया पूजा फफं हानं टक्सार दुने यंका खिचापुखूँ भुलां पुखूँ जुया यनि । थुगुसी च्वमि टेवहाया थकालि, स्थविर जूगुलि श्री लुमधि अजिमायात द्योया थकालि थकालिनकीं निम्हेसितं पूजा थिइका पूजाभः संकल्प याना वसपोलयात लसकुस यायगु पूजा यायगु सौभाग्य प्राप्त जुल । थ्व ज्या स्व. ज्ञानरत्न वज्राचार्य २०२४ सालनिसें २०५२ साल तक याना विज्यात ।

लसकुसया ज्या सिधयका थकालिनिसें सिन्हः तियगु ज्या जुइ । अनं लिपा द्यो छेंयागु छेंडिइ सदांयाथें द्यो खतं अजिमां निसें गछि विमान खतय विज्याकेगु ज्या जुइ । न्हापा जूसा द्योगू खलःपाखें कोचाखिं, दापा वाजं थाना वाचा तकं वसपोल भद्रकाली अजिमायागु नेपालभाषां मे हालीगु जुया वै च्वंगु खः । आ थ्व ज्या नं थःगु संस्कृतियात लोप यायगु हेतुं मचायकं हे त्वःफिनावं थें च्वं । बुरातयसं जिवं मफय धुकल । ल्यायम्हतयसं संस्कृति म्हासिइका नेपा देया थःगु संस्कृतियात धस्वाका तयगु चिउता मकागुलिं थथे न्हियान्हिथं संस्कृति लोप जुया वंगु खः । थ्व खंयात ध्वाथुइका दापा, खिं, धिमेया गुरुपिसं ल्यायम्हतयत प्रेरणा व हौसला विया थःगु दुगु आखाः छेंयात ज्याय खेले याना न्हेज्यानादिइ धका दुनुगलनिसें भापा च्वना । थःगु भाषा संस्कृतियात भीसं लोमंका वन धासा भीपिं नेवा जुया म्वाना च्वने फै थें जिं मताया ।

चैत्र शुक्ल, चउलाथ्व दुतिया कुन्हु सुथनिसें टेवहा, खिचापुखूयापिसं यथाश्रद्धां श्री लुमधि अजिमायात विमान खतय पूजाभः तया पूजा यायगु चलन थौतकं न्ह्याना हे वया च्वंगु दनि । वहे न्हिया न्हिनय् द्योपिं फुकं यचुक पिचुक सिला थः थःगु स्थानस न्हापा गथे विज्याका तःगु खः अथे हे गछि, कमाकंथं तया तैगु जुल । थथे याना पाहाचःहेया जात्रा क्वचाइगु जुल ।

गमय् द्योपा च्वनिपिं द्योलातयसं टेवहाया लुमधि अजिमाया द्योगु खलःतयत इमिसं गमय द्योपाला जुया च्वंगु वापते पौष शुक्ल पोहेलाथ्व मिला पुन्ही व चैत्र कृष्ण चिल्लागा पाहाचःहे वले कर स्वरूप चतामधि पुलेहयगु चलन आतकं दनि ।

देवमाला (भाषा) वंशावलीया पौल्या ३२ व ३३ स थथे च्वया तःगु

दु । खस भाषा च्या तःगुयात नेपालभाषा अनूदित याना न्हेव्यागु जुल ।

विक्रम देव वर्ष (दं) १२ वया काय गुणकामदेव दं ५१ जुजु महालक्ष्मीया व्रत सेवा याना विज्याना चंवले म्हगसय महालक्ष्मीं आज्ञा जुया विज्यात । हेराजन छं छगू पुरी शहर दयकि । परापूर्वकालय नेममुनि ऋषिं तपस्या याना वंगु थाय वागमतीयागु व विष्णुमतीयागु संगम हों थाय दथुइ विषयकान्तेश्वर दयाचंगु दु । वहे थासय न्हि न्हि इन्द्रादि देवतापिं विज्याना अनेगु वाखं न्यनाविज्याः व थाय उत्तम थाय खः वहे थासय कान्तिपुर नाम देवी खडगाकारं छगु सहर दयकी । व सहरं न्हिन्हिं लाख दांयागु कालविन जुई । अथे जुया चवंतले थ्व सहरय च्वना विज्याय धका आज्ञा जुल । व जुजु खुसी जुया शुभ बेलाय लाका १८ दो भ्मिच्यादो यागु सहर दयकल । कलिगत वर्ष ३८२५ वंका हाकनं करवीर मसान नं यथाक्रमेण दयकल । हानं पूर्व दिशाय चण्डेश्वरी हल । देशय मध्ये रक्षा यायत विज्याकल । हानं देशय पूर्व पाखे नीलपीठ काली जगे याना लुमधि नामं देश रक्षा यायत विज्याकल । वहे क्रमं देशया पश्चिमपाखे विष्णुमतीया स्थितय रक्तकाली कनक हंगेश्वरी जगेयाना देशया देपापाखें नगरय नवदुर्गा २ गण जगेयात । देशया दक्षिण मूल क्षेत्रपाल पंचलिंग भैरव जगे यात । देशया उत्तर पाखे रक्षा यायत इन्द्रायणी लुतीपीठ, मनमयजु पीठ, विजेश्वरी आकाशदेवी सहित याना जगेयात । पचलि भैरव, विजेश्वरी, आकाशकाली देवी, पूरा पूर्वय ब्रम्हपुत्री उठेजुया देवी तारा जोगिनीले मिले जूवंगु खः । हानं लोकेश्वर या जात्रा नं चलय यात । थ्व फुकं गुणकामदेव राजाया पालय जूगु खः ।

जुजु रत्नमल्लया पालय तव होम यायगु चलन ने.सं. ५९४ निं चलय जुउगु खः जुजु रत्नमल्लया पालय निसें शुरु जुया न्ह्यागु भद्रकाली लुमधि अजिमायागु प्याखं (गं वाखं) ने.सं. ६०५ निसें शुरु जूगु खः । थ्व गं प्याखं १२, १२ भिं निर्दय छको हुइकेगु चलन दु । थ्व प्याखनय च्वनिपिं सकलें गथु जातयापिं खः । गथु जातयापिं मध्यन वनमाली जक जुइगु धैगु खं जिं न्यना तैगु दु । १२ भिं निर्दय छको टेवहालय दुने मुग घोया जवपाखे थ्व प्याखं हुइकिगु चलन दु । वहनि गर्छिं घोपिं वसालाया बहालय विज्याकी । मूद्यो ल्हाना कलश व कथि विया माद्यो प्याखं हुइकिवाय विज्याकी । चछिं गुरुपिनिगु निर्देशने वाजंयागु तालय घोपिं सकलें प्याख हुला विज्याई । कहे खुन्हु न्हिनय प्याखं हुइका तैवले प्याखंया क्रमानुसारं २ म्ह नेपा फैचा पोसःया लागि तोती । घोपिं फुकं व फैचात लायत टेवहा शाही नेपाल वायुसेवा निगमयागु पश्चिम पाखे च्वंगु लुखां पूर्व पाखेयागु

लुखां पिनेवना सडक पार याना टुनिख्योलय थ्यकी । अन घोपिसं फैचात लाना हया टेवहालय हया भोग बिइगु चलन थौं तकं दर्नी । क्रमानुसार फैयागु हि त्वने सिधयका पोसः बिइगु ज्या सिधै । अले श्रद्धालु भक्तजनपिसं सकल घोपिन्त खें न्या थ्वं अयला तया सघं बिइगु याई । अनलिपा टेवहाया सकटाया घोपालाया थकालिया थाय घो बोयकेगु धका भैरवयात वसा लाया विज्याकी । स्व. ज्ञानरत्न वज्राचार्ययागु छेंय् वि.सं. २०४८ सालय सर्वसंध समुचय जुया पूजा यायेगु थायभूस सह भोजन नकेगु, धौ सगं खें सगं बिइगु ज्या जुल । थ्व क्रम सिधल धायवं हानं वसा लाया न्हापायागु थासेतुं विज्याकी । टेवहाया सिखाकारया थकालियागु छें लुमधि अजिमा विज्याकी । टेवहाया लुमधि खलःया पाखें लुमधियागु घोछेंय् कुमारी विज्याकी । थ्व स्वथासं च्वय् न्हेच्वयाथें श्रद्धां पूजा सहभोजन सिधयका न्हापायागु स्वासेतुं लित विज्याकी । लुमधि अजिमायागु खड्ग व श्री ५ महाराजाधिराजयागु खड्ग मखं त्वाल्य सिंहदुवाल्य हिला बुला यायत भी जुजु अन सवारी जुया विज्याई । थ्व हिलाबुला याथगुवात खड्गसिद्धि धैवैचगु दु । थ्व ज्या २०४८ सालया मोहनीबले जूगु ख. ।

दंय छको खड्ग जात्रा (पायो वयगु) धका घोपिनिगु प्रतीकया रूप्य् म्हतिं म्हतिं खड्ग ज्वना खाना वयगु चलन दु । अजिमायात छत्रं कुइका पायो वयगु ज्या जुइ । गछियात नं पाल्हाघोया न्हेवने यंका वहा चाहिइका स्थान गणेघोया थाय न्हेवने तक थ्यंका सकलें विज्याकी । वौ बावैम्हेस्यां वौनं छुवांस्य् वाना थकेगु चलन दु । विजया दशमी चालं कुन्हु घोया छें खड्ग स्वना तैगु जूगुलिं वहनी कुन्हु घो दर्शन याय खनी मखु । न्हापा तलेजु भवानीया थासं शाहीत तुयूगु लं जामां सिनाः पिहाँ वैगु खः । आ यौ कन्हय थथे वःगु खने मन्त ।

पं. श्री वद्रीरत्न वज्राचार्यजुं श्री भद्रकालिका (लुमधि अजिमा) या वंशावलिना पौ ल्या ३, ४, व १९ स थथें च्वया विज्यागु दु ।

स्वास्त श्रीयन् श्रीलुमधि कालिका सके वकूया वज्राचार्य रथनसिं जुस्य थ्व मुक दोहलपा जुल शुभ ।

शुभ सम्बत् १३९ मिति दशमी श्री लुमधिया शात उपद्रव देव आसनत दनाव थासय च्वन । शान्ति चतुर्विंशति बल्यार्चन यज्ञ जुरुजु रन्ह छुलंजु, जयताजु, ज्ञानछुरी ।

शुभ सम्बत् ८८२ मिति श्री श्री श्री लुमधि पाली पता चनंदुल औसी खुन्हु प्रतिपदा खुन्हु शांति यातकलं ।

शुभ सम्बत् ८८३ मिति फाल्गुन शुदि ९ स श्री लुंमधिया विघ्न व
हतारस सिकचा छेले छोयाया शान्ति त्रयात कुल श्री जय प्रकाश मल्ल देव
प्रभु थाकुरयां मालकव प्रसन्न जुस्य विज्याक चितायाक महानायक दातिम्ह
चक्रेश्वरी रनछुरिं दान काओम्ह ज्ञानकर यज्ञ मात्रा जुम्ह पू पंचधारा
हाय्का गुभाजु दक्कं थ्याक बां मे १, हंसम्ह २, दुगुम्ह २, फैम्ह २ चन्द्र
विम्बु सूर्य आत्मा विम्बु दान कंस बाता, न वाता, दक्षणा मालको प्रसन्न
जुस्य विज्याक जुल ।

शुभ सम्बत् ९१६ मिति माघकृष्ण एकादशी शनिवार श्री श्री श्री
लुंमधि द्योम्ह १३ गच्छि श्री ३ रणबहादुर महाराजनं दुसो कर्म पात ॥ द्वादश
श्रावण नक्षत्र परिघत योग आदित्यवार वरि घटि २ पला १४ विन्या घटि
प्रतिष्ठा याना ।

मु गुभाजु रत्नमुनि, उपाध्या अतिकर तव होम यां शुभ थ्व देव गच्छि,
टेवहालस तया शुभ ॥

सम्बत् ९१६ मिति फाल्गुन कृष्ण नवमी पर दशमी खुन्हु श्री ३
लुंमधि देवम्ह १ घटी ६ निन्याधरि ९ प्रतिष्ठा याना श्री ३ वज्राचार्य रन्हुमु
मुर गुभाजु जजमान न्यतस च्वन भतुपांन्या कवदार नतर थकालि वटु
गुंचा त्वलस च्वनम्ह भाजु नरसिं देव वटु त्वालयया खतस तल शुभ ॥

श्री श्री श्री भद्रकालिका लुंमधि देवयागु वूं स्यना वनगु वूं श्री ३
रणबहादुर महाराजानं प्रसन्न जुसे विल लुंमधि देवया गुभाजु सबल मुगलया
वज्राचार्य रत्नमुनि, दुगंबहिलया वज्राचार्य श्रीभद्र, ज्ञानकर, छुलिं, अतिकर,
चक्रपति, गदेजु बुद्धिनारां दोलखाया, थ्वति समुच्चा थन विनति याना वूं
पेक ३ लुंमधिको पेक १ चूर २ वूं तुखुचा प्रसन्न जुया विज्यात थुलि प्रसन्न
जुसेलि थ्व विद्या भू दयेकाव तव होमस गुथिसं: दुता थ्व विद्या सु गुठी
समुच्चयन थकाली गुभाजुं विचाल यायेमाल थ्व वी धागु सुनानं लोम
यातसा पञ्च महापाप लायु विचार याना तलसा श्री कालिकाया सुदृष्टि
शुभ: ।

शुभ सम्बत् ९५५ मिति मार्गशीर्ष शुक्ल दशमी रेवती नक्षत्र व्यदिपात
योग बुधवार मीनराशी खुन्हु घटी १० विनाघटी १२ लुंमधिस श्री महाकालिका
लुया मुकन देव तलम्ह २ देव शनिश्चरवारस बोयम्ह खतस तयम्ह व
जात्रा यायम्ह छम्ह नक्काया भोताहितिस च्वनम्ह धिजनारां श्रेष्ठन देवम्ह
२ तल थुकिंस नक्काया गुभाजुपिं भवावहाले च्वम्ह जयपतिधन समंतभद्र ।

शाक्यमुनि अमृतमुनि थुलि नक्का गुभाजुपिसं भकदा जुयाव न्हापायागु

पदधति केनाव तवहोमया गुभाजु ज्येष्ठ अमृतमुनिनं श्रीकालिका मुकन देव
कुसन खुन्हु दुसकल कर्म गं कलश दुसो मण्डल सहितनं पूर्ण यानाव पूजा
यानाव भुक्ति मुक्ति सम्पूर्ण यानाव सिद्धयका जुल ॥

सति खुन्हु कलस विसर्जन यानाव यज्ञ स्थापना यानाव पूजा यानाव
यज्ञ सम्पूर्ण प्रतिष्ठा यानाव सिद्धयका जुल । वटु टोलस लुंमधि देवया छेस
छम्ह चतुदर्शी खुन्हु जात्रा यायेम्ह देव छम्ह तल छम्ह देव शनिश्चरवार
वोयेम्ह छे थेनेव देवला पोतयात लव ल्हानाव विल पूर्णाकलश राजकुलस
दुत विल इन्द्र कशल छगनं ॥

छक पूर्णाकलश कजिकन जोनकाव यन जुल ॥

संमंतभद्रनं च्वयाव तया जुल ॥

शुभ सम्बत् १६२ मिति फाल्गुन कृष्ण पंचमी लुंमधि गनस देवया
खत प्रतिष्ठा वटु टोलस च्वनम्ह सरदार रससिं थ्वया कलात वारस्वभा
धुपिनिसं वटु टोलस च्वनगु लुंया खत तल मुलाचार्य धिजपति, उपाध्या
दानपति वेताजु समन्तभद्र ।

श्री यक्षमल्ल जुजुया दातिम्ह काय श्री रत्न मल्ल खोप देशं यें देश
विज्यानाव श्री लुंमधि कालिकाया न्ह्योने दँय छकः भुक्ति मुक्ति सहितनं
तव होम याय्गु नेपाल सम्बत् ५९४ दँस तयाविल । जुजु रत्नमल्लं तया
विज्याःगु जूसां तवहोम गुठीया पद्धति यक्ष मल्ल जुजुयागु हे नां जुया च्वंगु
दु । युकिया साछि दँय छकः पाँचःह्वले लुंमधि अजिमा (भद्रकालिका) या
अग्रे थौ तकनं राजा प्रजापति सुख वृद्धि जुयेमा धका तवहोम “मे छ्यौं
दुयेगु होम” चले जुया वया च्वंगु दहे दनि । व तवहोम अंजल धालसां
मोहनी थौ तकं श्री ५ महाराजाधिराज सरकार प्रभुयात चन्हेय याना वया
च्वंगु दहे दनि ।

रत्नमल्ल जुजुं थ्व तवहोम गुथी तया अनलिपा मन्त्रसिद्धि महाविहार
या वज्राचार्यपिंपाखें खड्ग सिद्धि पूजा मालित धालसां गथुतयत गंछि
१) ब्रह्मयणी २) रुद्रायणी ३) वैष्णवी ४) इन्द्रायणी ५) वाराही ६) गणपति
७) कौमारी ८) भैरव ९) महालक्ष्मी १०) सिद्धिनी ११) व्याघ्रिनी
१२) श्री भद्रकालीकाया नृत्यारम्भ जुया नेपाल सम्बत् ६०५ साले सर्वप्रथम
श्री रत्नमल्ल जुजुं मोहनीया चालं खुन्हु सिंह दुवाते श्री भद्रकालिका लुंमधि
अजिमाया खड्गसिद्धि लाना विज्यात ।

अनलि मल्ल जुजुपिसं लिपां श्री ५ रणवहादुर शाह देव जुजु निसें
खड्ग सिद्धि याना वया च्वंगु परंपरानुसारं ध्वहे ने.सं. १९०० साल आश्विन

शुक्ल पञ्च दशमी मोहनीया चालया रात्रिस मखं त्वाया सिंहदुवाने भी जुजु
श्री ५ महाराजाधिराज वीरेन्द्र वीर विक्रम शाह देव वसपोलं नं
परम्परानुसार श्री भद्रकालिका खड्गसिद्धि कया विज्यागु जुल ।

थये श्री भद्रकालिकाया खड्गसिद्धि व प्याखं भिनिदय् छको थौ तकं
चले जुया वया च्वंगु दहे दनि ।

श्री संकटायागु नं च्वामो छफि ज्वना नं थो खड्ग सिद्धिवले वनेगु
याना वै च्वंगु दु ।

देशय् विघ्न उपद्रवादि शान्त जुयेमा धयागु कामना यासं मन्त्रसिद्धि
महाविहारया वज्राचार्यपिसं दछिइ छको श्री भद्रकालिकाया अग्रे तव होम
धालसां (मे छयों दुयेगु होम) थौ तकं याना वया च्वंगु दहे दनि ।

श्री साफल्य अमात्यजुं चोया दिइगु “टुंडिखेल वरपर विद्यमान
स्मारक एवं देव स्थलहरू” धैगु वःचाधंगु सफुलिइ सन्दर्भ ग्रन्थस थ्व
न्हथेना दिइगु दु ।

श्री धनवज्र वज्राचार्य (सम्पादक) त्रिरत्न सौन्दर्य पाठ्य २०१० पौ ल्या ५७ ।

श्री कृष्णप्रसाद श्रेष्ठ (सम्पादक) स्थाननाथ क्षेत्रा नेत्र २०१० पौ ल्या १४१
प्रज्ञा प्रतिष्ठान २०४४ पौ ल्या १४१

A Report on the Servey and Study of Newari Script
National Archives Nepal अप्रकाशित सन् १९९९, १९९९ नं.

राजवंशावली श्री शंकरमान, कान्तिपुर शिलालेख सूची, राष्ट्रिय
अभिलेखालय काठमाडौं २०२७ पौ ल्या १०२, १०४, ११९, १२१, १२८, १६१

श्री वद्रीरत्न वज्राचार्य लुंमधि अजिमाया वंशावली काठमाडौं ने.सं.
११०७ वि.सं. २०४३

वि.सं. २०५१ साल स का.न.पा. ११ वडां मन्दिरयागु इलां मर्मत यागु खः ।

वि.सं. २०१५ सालस स्व. श्री ५ महेन्द्र वीर विक्रम शाह देव जुजुं
भद्रकालीया थाय जीर्णोद्धार याना पिने तप्यंक पेटी निर्माण याना विज्यागु खः ।

वि.सं. २०३८ सालय काठमाडौंया तण्डुकार परिवारनं मन्दिरे स्थापना ज्या यागु
खः । मन्दिर दुने द्वाहा वनेवले देपा पाखे दुःख लोहतय अभिलेख तगु दु ।

देवहाया लुंमधि अजिमाया गौछि पाहानःले कुन्तु थोछे थोपि कुदां
विज्याके न्हयो थो पूजा याना थो संका कुहां विज्याके भागु प्रावधान दु ।
थोपि खते विज्याके धुंका लयासिवा जोलं पूजा योगू खलःया एकालि पूजा
याना बलि विइगु ज्या जुड । अनलिपातिनि थोखः ल्होना देवहा चाहिइके
भागु चलन दु ।

गमय विज्याके धुका मंत्रसिद्धि महाविहारया भद्रकाली खलया वज्राचार्य
लयसिवा जोल पूजा याना विज्याई । अबले हे पंचवर्गल वियगु ज्या नं जुइ ।

द्योगू खलया थकालिं लयसिवा जोल पूजा याना वैच्वंगु थौ तक्रं
दनी । चैत्र कृष्ण चिल्लागा औसी कुन्हु थकालिं लयसिवा जोल पूजा याना
कन्या, मलजा नकेगु ज्या नं थौतक्रं चले जुया वैच्वंगु दनी ।

औसी कुन्हु वहनी गमं द्यो थना हया दुख्यलय् द्यो त्वाक्रे सिधयका
हनुमान ढोकां दरवारयागु पूजा कया विज्याय धुंका भुलय् (यट्खा) स
चछिं तया द्यो कोव्यूपिन्त समयबजि चान्हय नके मागु जुल ।

चैत्र शुक्ल चउलाध्व दुतिया कुन्हु विमान खटय हे दुगु वलि विया पूजा
यायमाल । थ्व सिधयका द्यो सिलेगु ज्या जुइ । द्यो सिले धुंका तले थःथःगु थासय्
द्योपिं विज्याकी । थकालिं हानं लयसिवा जोल पूजा याना वलि वीमागु प्रावधान दु ।

थन हानं लुमधि अजिमाया देगःया बारे केलत्वाःया स्थानीय मनूतयसं
धाः कथं थुगु द्योया बारे छगू विस्कं वाखँ (किम्बदन्ती) दु ।

परापूर्वकालय केलत्वाःया लिकसं लाःगु सुचिकाः गल्ली दुने च्वम्ह
छम्ह नेवाः कुलया मनू न्हिथं तिंख्यया लुंमधि अजिमा (भद्रकाली) द्यःया,
थाय् वनिगु जुयाच्वन । छन्हु सब्बु चान्हय अन द्यःया थाय् ववलय् द्यः
प्रसन्न जुया उम्ह मनूयात पात्रय जायेक लुंचुं तया व्यूगु जुया च्वन । तर
उम्ह मनू ग्यानाः पात्र अनसं तोता थःगु हे छैय् बिस्पुं वल । वया ल्यू ल्यू
द्यो नं उगु लुंचुंया पात्र विइत वयाच्वन । लय ववं केलत्वालय थ्यनेवं न्हेखा
ग्वङ्गः हालाहःगु तायेदत । अले लुंमधि अजिमाद्योनं लुंचुं दुगु पात्र अन हे
भ्वपुइका कथं विलीन जुल ।

थुगु वाखं कथं नं देगःदुनेया मूर्ति स्थापना याये न्हयः तक भ्वपुया
च्वंगु पात्र आकार यथावत् दुगु व उकी हे पूजा आज्ञा याना वया च्वंगु खः ।

नापं लुंमधि द्योनं उकथं लुंया पात्र ज्वना वःवलय् लय् वाः थाय
तक्क पीठया उत्पत्ति जूगु खः । गुक्रिया दसु कथं महावैद्व्या आः महाकाल
स्कूल लागाय् मासंगल्लीया क्काः सिमा (पीयूषवर्षी औषधालय) मासंगल्ली
का.म.न.पा.या २७ वडा भवनया उत्तर पाखें द्यो भच्चा भासु लंगु व
मासंगल्लीया हे आः शुभकामना प्रेस दुथाय वंगल सिमाया थाय् थौतक्रं नं
लुंमधि अजिमा (पीथ) या रूपय् यथावत् दनिसा विशेष पर्वय पुजा नं
यायेमाःगु चलन आः तक दनि ।

लुचुभुलु देगः दुने लुचु भुलु अजिमा, भैरवद्यो गणेशो कुमारी द्यो
लोकेश्वर द्यो भिंदोया नापं लुंमधि (भद्रकाली) द्योया थाय् दुपिं फुक्क हे

वयाथें चःपिं दु । धी धी किम्बदन्ती वा वाखंया दथुइ नं न्त्यपुसे च्वंगु यथार्थ नं सुला च्वंगु दु । थ्व च्वय न्हेथनागु खं विश्वभूमि न्हिपौस नेपाः गालय वस्ती शुरु जूबलय् निसें नीस्वनातःगु धो केलत्वाःया “कुला भुलु अजिमा” जीर्णोद्धार याना पित व्यूगु ल्याचा पतिइ उल्लेख जूगु न्हेव्वयगु सान्दर्भिक जुइगु ताया न्हेव्वयागु खः ।

आ थन श्री साफल्य अमात्यजुं च्वया दिउगु भद्रकालीया वारं नेपाल्य विज्याय धुंका प्रख्यात जूगु विषयलय् छुं खं थन न्हेव्वय त्यनागु जुल ।

भद्रकाली पीठयात “लज्जा पीठ” धका नं धायगु या । वसपोल श्री वज्रतुण्डी, श्री प्रत्यंगिरी, श्री विशाला नामं नं प्रख्यात जू । कान्तिपुर पापिं न्याम्ह मुख्य कालिका (चामुण्डा) पिं मध्ये भद्रकाली लुंमधि अजिमा नं छम्ह खः । भाषा बंशावली अनुसार कान्तिपुर नगरीया निर्माण याय धुंका जुजु गुणकाम देवं व नगरयागु रक्षा यायगु लागिं पूर्व दिशाय लुंमधि (भद्रकाली माहेश्वरी) स्थापना याना विज्यात । लिच्छविकालय् विभिन्न दिशास पीठत स्थापना याना उगु वखते कान्तिपुर (अर्थात् कोलिग्राम व दक्षिण कोलिग्राम) या इलाकायात निर्धारण यागु खनेदु । उगु वखते कान्तिपुरयागु नगर पूर्वपाखे पनैले जुया भद्रकाली पीठ तक खः धै तःगु दु । साधारणतया नगरया सिमानाय कुल देवता (दिगु धो) या स्थानत स्थापना यायगु चलनं थ्व खंयात पुष्टि या । छायाधासा भद्रकाली स्थाने पश्चिम व पूर्व पाखे याना छगू दर्जनं मयाक नेवाः समाजयागु कुलदेवता (देगु धो) दु ।

लेखकंया दिगु धो नं लुंमधि अजिमाया लिउने दु । वैशाख शुक्ल पञ्चमी कुन्हु देगु पूजायागु न्हि खः ।

श्री लुंमधि अजिमाया देगले वनेत पश्चिमपाखें छुं लोहंया त्वायः गया वनेमाः । लुंमधि अजिमाया देगःया उत्तर, पूर्व व दक्षिण पाखे सतःत दु । गणेद्योयागु देगः नं दु । देगःयागु स्थापना मल्ल कालयागु हे जुइमा । देगलय् दुहां वनेगु द्वारया जवं खवं ततःधिकःपिं सिंहया मूर्ति २ गू दु । अन तया तःगु ने.सं. ६९८ (वि.सं. १६३४) यागु अभिलेख अनुसार व सिंहत जयनृपेन्द्र मल्लया इलय् वीरभद्र भारोनं स्थापना यागु खः । सिंहया ठीक न्हेवने वेतायागु लोहंया मूर्ति दु । वेता भैरवया वाहन व आसन खः । फुक्क पीठय नं न्हेवने वेता ग्वतुला च्वंगु दै । देगलय् पुलांगु सिं सेना वना २०३८ सालय सिमेण्ट ढलान याना मेगु दुहावनेगु लुखा तःगु खः । देगःया पेखे चाकः मत निगू तहले ताना तःगु दु । देगःया छायाखेरं तगोगु चिगोगु धलोवतयागु १२/१३ गं दु । देगलय् धासा छुं वास्तुकला खनेमदु । नेपाया

प्रसिद्ध गुह्येश्वरी देवीया देगल्य् धें पेखेरं खुला सर्गःया कोय पेंगः लुंसिया तःगु लीयागु पाताय् कलात्मक नागत व लुंसिया तःगु लीपाता लेपं इलायात ज्वंका तःगु दु । ध्व इलाया च्वय् गंजू दु । पाहाचःहें कुन्हु वया नं च्वय् पुलांगु इलां तै वै च्वंगु दु । व इलायात मर्मत यायगु कुतः धासा जू धें मच्चं ।

देगल्य् दुने दुहां वने साथ छजो ध्वाय् जोना च्वापिं डलौटया सिंहत खने दइ । देवीया शिलामूर्ति न्हेवने चिकिचिकिधकःपिं सिंहत, डलौटयागु हे ध्वाय् लुंसिया तःगु लीपातायागु तोरण व किकिंपात दु । देवीया मुख्य लीपातायागु तोणय् नव नागया छयों दु । ध्व लुंसिया तःगु कलात्मक नागया तोरणय् अष्टमातृका देवीपिनिगु मूर्ति कियातःगु दु । व तोरण वि.सं १९०८ स जनरल बमबहादुर कुंवरं तया दिइगु खः । तोरणया ठीक च्वय लुंसिया तःगु नागयागु छगू छत्र नं दु । देवीया ठीक ल्यूने तःधंगु तोरण व छत्र दु । लीयागु पाताय देव देवीपिं किपा तःगु कलात्मक तोरणया जवय खवय लीपातायागु चन्द्र सूर्य अंकित ध्वाय् दु । देगल्य् देपापाखे कौमारी, भैरव, वैष्णवी, वाराही व जव पाखे सिधिनी, कुमार, गणेश व ठीक न्हेवने व्याघ्रिनीयागु शिलामूर्तिंत दु । देवीया जवपाखे छपु ताःहाकःगु खडग दु । देपापाखे नयागु त्रिशूल दु । अन पात्र यनेत लोहंयागु छगः पात्र नं दु ।

सांस्कृतिक व कलात्मक सम्पदानं आपा हे धनीगु लुंमधि देगल्य् न्हूगु व पुलांगु याना छगू दर्जनं मयाक शिलापत्रत दु । थौतक दुगु शिलापत्रम् दक्सिवे पुलांगु ने.सं. ७९२ (वि.सं. १७२९) यागु जुजु प्रतापमल्लया इलेयागु खनेदु । सतः जीर्णोद्धारयागु सम्बन्धय तयातःगु ध्व अभिलेखं लुंमधियागु प्राचीनतायात प्रमाणित या ।

लुंमधि स्थानय् निर्माण, मर्मत, जीर्णोद्धार व देगःयागु कलात्मक वस्तु नं श्रृंगार यायगु ज्याया शुरुवात जूगु अभिलेखत अनुसारं जुजु प्रतापमल्लया इलय ने.सं. ७९२ (वि.सं. १७२९) निसें जुया च्वंगु प्रमाण दु । व अभिलेखय् जुजु प्रतापमल्लया इलय राम दैवज्ञ, मोहोन भारो आदिपिसं सतः जीर्णोद्धार यागु खँ उल्लेख दु । थये हे जुजु नृपेन्द्र मल्लया इलय ने.सं. ७९८ (वि.सं. १७३४) व ने.सं. ८०० (वि.सं. १७३६), जुजु पार्थिवेन्द्र मल्लया इलय ने.सं. ८०६ (वि.सं. १७४३) व ने.सं. ८६७ (वि.सं. १८०४) स देगः जीर्णोद्धार जुउगु व अन्तिम मल्ल जुजु जयप्रकाश मल्लया मन्त्री अंमात्य जोरावर सिंह नं लुंमधिस धर्मशाला दयका चान्हय् मत च्याकेंगु गुठी स्थापना यागु खँ उल्लेख दु । ने.सं. ८९० (वि.सं. १८२७) ने.सं. ९७५

वि.सं. १९११। स तेजनारा भारोन चौधेरा सतः दयकुगु, ने.सं. १८३
 (वि.सं. १९२२) स थः वौ जसरामं दयकुगु सतः जीर्णोद्धार याना फलेचा
 दयकुगु हर्परामयागु शिलालेख दु । ने.सं. १९११ (वि.सं. १९२७) स थयोगु
 किसिमं मर्मत, सुधारया ज्यात जुडगु खनेदु ।

थये मल्लकालया शुरुवार्तानसे प्रसिद्धि प्राक्त जूगु श्री लुंमधि देगःया
 पूर्व दक्षिणकोणय छगू चैत्य नं स्थापना याना तःगु दु । कान्तिपुरया सम्पूर्ण
 जनता चाहे इपिं हिन्दू धर्मावलम्बी जुइमा वा बौद्ध, निगू धर्मावलम्बीतयसं
 नं उतिकं हे श्रद्धा भक्ति याइम्ह श्री लुंमधि अजिमा नेपांमिनयगु धार्मिक व
 सांस्कृतिक सहिष्णुताया प्रतीक जक मखसे प्रेरणाया स्वांत न ख. धयां छुं
 पाइ थें मत्ता ।

थन दैयदसं मोहनी व पाहाचःहे वले तधंगु मेला जुडगु या ।

१२ भिनिदँय् छको हुइकिगु लुंमधि अजिमायागु गं प्याखं सिधल
 धायव गछियागु खापा गुम्ह गुम्ह द्यो खः अन अन हे द्योयायाय तइ द्यो
 जुइपिं सकसितं सीजा नका तीनधाराय यंका नुसिका द्योपिं सकसितं गजय
 तया तइ । शुद्ध चान्हय टेकुइ वना थःथःगु खापा थःथःम्हं ज्वना वना उड
 वनिगु चलन दु । थयेयाइगु सुनानं स्वयमज्यू धैगु खं जिं न्येना तैगु खः ।
 खापा उडगु ज्या आषाढकृष्ण, तछलागा भलभल अष्टमी कुन्हु जुडगु खः ।

का.म.न.पा. २२ वडा टेवहा, तीर्थविहारस लुंमधि अजिमायागु द्योछें
 छखा दु । द्योछें स्वत जागु खः । छेडीइ पाहाचःहे वले जक द्यो कुहां
 विज्याका निसें यहा विज्याकेगु ज्याय जक ज्या वः । मातं तल्लाया दुने
 खापा दया नं द्यो विज्याना च्वं थाय् भयारर याय्गु खापाया दुने तिनि द्योपिं
 गछि विज्याना च्वं च्वंगुदु । मातं तल्लाया पश्चिमाभिमुख जुया द्योपिं
 विज्याका तःगु दु । पश्चिमपाखे जवं खवं सियागु तिका भया व दथुइ
 लुंमधि अजिमायागु लुंयागु मूर्ति सहितयागु लुंसिया तःगु तिकाभया दु ।
 दक्षिणपाखे तिनमुखे कलात्मक भया दु । पिनेनिखें कलात्मक तोनासिइ
 अष्टमातृका दना च्वना विज्यागु तोनासि १७ ग. दु । उत्तरपाखे पिने छुं
 मदु । दुनें सियागु तिकाभया तप्पागु छपाः जक दु । व तप्पागु तिका भयाया
 जवेया यासं स्वते वनेगु स्वहाने दु । स्वतं जुसां निखें कोछू पाखा जुल ।
 निखें टायलयागु पौ तया तःगु दु । पौया दथुइ गजू नं प्रभा तया लुंसिया
 तःगु छगू दु । स्वतंया दक्षिणपाखे चिपागु निपाः भया दु । मातंया दक्षिण
 मोहदाया तिनमुखे भयाया जवं खवं श्री लुंमधि अजिमायागु किपा च्वका तै
 तःगु दु ।

द्योयागु छें दुगु छगू शिलापत्रय थथे च्वया तःगु दु । ने.सं. ९६९. स
टेवहा नछेस च्वम्ह भारनरसिनं चैत्र शुक्ल प्रतिपदा कुन्हु टेवहा खतय १ म्ह
व वटु खःतय छम्ह १ दुगु बलि दयदसं विया पंचोपचार पूजा यायमा धका
शिलापत्रय उल्लेख याना तःगु दु ।

द्योपिं पश्चिमाभिमुख जुया न्याम्ह अजिमापिं बिज्याना च्वंगु दु ।
जवं खवं अष्टमात्रिका गण व द्योया न्हेवने सिंघिनी व व्याघ्रिनी बिज्याना
च्वंगु दु । द्योया च्वय् लुं सिया तःगु पातायागु इलांमे च्वय् नं लुंमधियागु
मूर्ति दु । वयं टायलं सिया तःगु दु । द्योया थाय लिउने नं लुंसिया तःगु प्रभां
दु । ख्वप्रभा ने.सं.१०२९ माघ शुक्ल दशमी कुन्हु महर्जन बुद्धिनारांनं दुता
जुल धका उल्लेख याना तःगु दु ।

द्योया थाय् दछियंक चःहे वले मन्त्रसिद्धि महाविहारया वज्राचार्य
पूजा याना मे बलि पर्व पर्वस विया वै च्वंगु दु ।

सिलाचःहे कुन्हु मन्त्रसिद्धि महाविहार (सवलवहा) या वज्राचार्य होम
याना पूजा जुइ । (टेवहा) राजकीर्ति महाविहारया स्थविर थकालि वज्राचार्य
बलि वियगु पूजा याना चर्चा गीत धाये चचा हाले मागु स्थिति पूर्ववत्
जुया च्वंगु दु । मूलाचार्य सवल वाहायाम्ह व उपाध्या गुरुजु टेवहायाम्ह
जुया दयदसं पूजा जुया वै च्वंगु दु ।

२०४२/८/२१ स लुंमधि चुक (चिकं अत) स जिपिं ४६ म्हसिनं
पूर्व सेवा वना च्वेय न्हेव्वया थें पूजा याना वय धुंगु जुल ।

लुंमधि अजिमाया वारे जोहन के.लक.एस.जे. (Jhon K. Locke
S.J. नं च्वया दिइगु Buddhist Monasteries of Nepal धैगु सफुलिई
नं लुंमधि अजिमावारे उल्लेख याना तःगु जुल । व च्वखं "श्री सकटा
राजकीर्ति महाविहार (टेवहाल) का संक्षिप्त परिचय" सफूया पौ ल्या ३४ व
३५ स उल्लेख जुया च्वंगु दु ।

ख्व लुंमधि अजिमायागु पीठ टेवहा, खिचापुखू, नछेगल्ली व
पुखुद्यांयापिनि पीठ खः ।

जि मचावले आदरणीय स्वर्गीय पिता श्री आशारत्न वज्राचार्यजुं थः
मूलाचार्य जुया बिज्याना पीठ सेवा व्वनायंका बिज्यागु दु ।

ख्व पीठस बौद्ध मतानुसार ग्रह मातृका पाठ याकेगु याना वै च्वंगु
इ ।

पं. श्री वद्रीरत्न वज्राचार्यजुया तत्वावधानय् दयदसं धै थें आशिवन
शुक्ल पक्षया प्रतिपदानिसं नवमी तक यें, ठिमी, ख्वप व सकोया वज्राचार्यपिसं

चौद्ध मतानुसार यागु वस्त्रं पुना होम याना वै च्वना विज्यागु दु । अन
 डातापाखें जप, पाठ याकेगु व जातः स्वकेगु नं याना वै च्वंगु दु । अथे पाठ
 याका विज्याबले जिं नं वना पाठ याना वै च्वनागु दु ।

उलिमछि ताहाकःगु इतिहास दुगु श्री भद्रकालिकाया विषयय् माला-
 वाला स्वत धासा सिइकेवहगु खँ अभ्र नं आपालं दइतिनि । आयात थुलि
 नं जुल ।

इति

सहायक ग्रन्थ

१. स्व. पं. श्री कमलानन्द वज्राचार्य - जनवाहाद्योया वाखं
२. पं. श्री बद्रीरत्न वज्राचार्य - प्रसिद्ध वज्राचार्यपिनिगु संक्षिप्त
विवरण
३. पं. श्री बद्रीरत्न वज्राचार्य - श्री भद्रकालिका (लुँमधि अजिमा)
या बंशावली
४. इलष्ट्रेशन - एकाराम - भद्रकाली (कमिक्स) लुँमरि अजिमा
५. श्री साफल्य अमात्य - टुँडिखेल वरपर विद्यमान स्मारक
एवं देवस्थलहरू
६. देवमाला (भाषा) बंशावली - हस्त लिखित